

Tala mai le Kolisi Faa-Faifeau i Malua / News from Malua Theological College; Lomiga XLVI - Setema 2022

TALOFA LAVA!

Ou te muamua ona ou faatulou i le paia mauluga o le fono usu a le Eklesia i lenei tausaga, 2022. Afio o le Taitaifono ma le Laulau o le Fono Tele, le nofo-a-komitit ma le mamalu o usufono tofia o Matagaluega o le Eklesia Faapotopotoga Kerisiano Samoa. Faatalofa faapitoa i le Taitaifono, le Failautusi, ma Sui Mamalu o le Komiti o Malua – o le Komiti Faatonu – o Tama o le Eklesia. Malo le soifua maua ma le lagi e mama.

E muamua ona sii le viiga ma le faafetai i le Atua, i lona alofa ma lona agalelei, ua tapuaoina ai i le manua le sa-folau o le Eklesia i lenei vaitau, ua aulia ai i le manua lana Fono Tele o lenei tausaga. E ui lava ina afatia le malaga i le ala, ona o mea e tutupu i le soifua, e pei o faama'i, ae o le puipuiga malu o aao agalelei o le Atua, ua faataunuina ai i le manua nisi o fuafuaga faataoto o lenei tausaga, e le gata o le Eklesia, ae faapea foi le Kolisi Faa-faifeau. O lea ua to'a i ulugalu le mafua-alii, o le tofa fefaasoaa'i ma le utaga saili a le Eklesia i matupa talanoaina o lenei Fono Tele, i le taitaiga a le Agaga o le Atua, auu se manua aga'i i luma o le Eklesia. Malo le tauata'i ma le faatoatoa.

I le ava tele, e faatalofa atu ai i le paia ma le mamalu o le au-faitau o lenei Lomiga, o le Maluapapa o lenei tausaga, i le suafa manumalo o Keriso. O le Lomiga e faailoa ai tala otooto o mea e tutupu i le lotoifale o Malua, i lenei tausaga.

Na faia le sauniga faapitoa, e amata ai aoga ma polokalame a le Kolisi o Malua i lenei tausaga, i le Aso Lua 15 o Fepurari, 2022, i le itila e 7.00 i le afiafi, i le Malumalu o le Eklesia, le Maota Iupeli. Na taitaia e le Afioaga i le Taitaifono o le Komiti o Malua, le Susuga i le Toeaina ia Asotasi Gu Time, faatasi ma le fesoasoani a le avuua filifilia mo lea sauniga, le Susuga i le Failautusi o le Komiti o Malua, le Toeaina ia Leaso Tupa'i, Susuga i le Toeaina ia Amuria Seuala, ma le Susuga i le Toeaina ia Misipalauni Faatau, o sui mamalu lava o le Komiti o Malua.

Na faafaoia aloia ai i lea sauniga le Susuga i le Fomai Faiaoga ia Fatilua ia Tausaga Muamua. O Fatilua na faiaoga i le Aoga Faa-faifeau a le Pasefika i Fiti, ae ua taliu mai mo le galuega i Malua. Na faafaoia ai ma A'oa' o ma Faletua o le Tausaga Muamua. Na faaiuina lea po taua, i le taumafataga i le Fale Senetenari. O se tala fiafia, ua faaiuina ma le manua le taumafai o Fatilua Fatilua, ua maula lona PhD.

Ua taliu mai foi ma le manua le Susuga ia Visesio Saga ma le Faletua, faapea le Susuga ia Brian Kolia ma le Faletua, ina ua faaiuina manua le taumafai, i o la faailoga o le PhD mai le Melbourne University of Divinity.

O le tausaga nei ua amataina ai le polokalame o le Master of Theology i Malua. E to'a fitu i latou o loo iai le faamoemoe e faauu i le polokalame lea i le faaiuga o le tausaga nei. E aofia ai i lenei to'a fitu ia Faifeau Tausinuu e to'alua, ma Faifeau mai Kiribati e to'alua. O loo lelei le Sila.



**Susuga Faifeau Fomai Faiaoga
Vaitusi Nofoaiga (FS)
Pule o le Kolisi**

faatinoga o lea polokalame.

O se tala fiafia, le faataunuina ai o le tatalaina o le Aoga Tusi Paia a Malua i Manukau ma Aukilani i Niu Sila. Na matagofie lea faamoemoe ona e le gata na auai Susuga i Toeaina Faatonu o Manukau ma Aukilani ia Vaaelua Patu ma Pouniu Faamausili, o Tama Penisione ia Tautiaga Senara ma Otele Perelini, o Susuga i Faafeagaiga i Aukilani ma Manukau, ae faapea foi le Afioaga i le Taitaifono o le Komiti o Malua, le Susuga i le Toeaina ia Asotasi Gu Time, le Failautusi Aoao o le Eklesia ia Taufao, ma Malua mai Samoa. Matagofie lea also faitauna, ina ua auai mai Susuga i Toeaina Faatonu mai le Laumua o Aotearoa ia Faatulituli Setu, ma Faletua Malaua mai Niu Sila i Saute, i ala o fesootaiga faaonaponei o le Zoom. Na taitaia le sauniga amata e le Susuga i le Toeaina ia Patu, faatasi ai ma le fesoasoani a le avuua filifilia, le Susuga i Toeaina ia Faamausili ma Setu. O le Susuga i le Faafeagaiga ia Talia Tapaleao, o le Taitaifono lea o le Komiti Faafaoe o le Aoga Tusi Paia i Aukilani ma Manukau. E aofia i lea Komiti, Susuga i Toeaina ia Vaaelua Patu ma Pouniu Faamausili, Susuga i faafeagaiga ia Peni Leota, Featunai Liuaana, Sesera Tolovaa ma Eperone Futi. E momoli ai le faafetai ma le faamalo, i Susuga i Toeaina o Mataupu Tau-le-Aufaigaluega ia Faamausili ma Patu faapea Susuga i Faafeagaiga, e tau ala atu i lenei Komiti Mamalu, sa galulue punouai mo le faataunuina o lenei miti a le Eklesia i Niu Sila. Ia manua tele le amataina ma le faaauauina o le Aoga Tusi Paia a Malua i Niu Sila.

SILASILA I TOTONU

Talofa Lava! - Rev Dr Vaitusi Nofoaiga (FS)	1
Amata Galuega a le Kolisi 2022	2
Saafiafiga mo Rev. Elder Taeipo Malifa	2
Faiaoga Toe Taliu mai	3
Faauuga o le Faailoga Fomai	3
Aoga Tusi Paia	4
Samoa Journal of Theology	4-5
Faauuga FS / Masters	6

Itulau o Faiaoga	7
Mafutaga a le Kolisi	8-9
Aoaoga a le Fanau	10
Faamuli o le Eseta / Tautai Ae	11
Faamatatalaina o le Faamalama	12
Motu o le Pa	13
Atinae a le Kolisi	14
Pesepesega / Vaaiga Eseese	15/16

O le Aso Lulu 15 Iuni, 2022 na tatalaina aloia ai le tusitusiga faa-va-o-malo a le Kolisi Faafeaga i Malua, o le *Samoa Journal of Theology*. O lenei faamoemoe sa amata i le faigalotu na saunia e le Susuga i le Taitaifono o le Komiti o Malua, le Susuga i le Toeaina, Asotasi Gu Time, ona faagasolo ai lea o le polokalame o le aso. Na auai le Susuga i le Failautusi o le Komiti o Malua, le mamalu o le Laulau o le Fono Tele, ma sui mamalu o le Komiti i Samoa nei, ma o latou Faletua. E faateleina ai pea le viiga o le Atua ona o lana taitaiga, e ala mai i le tatalo ma le tapuaga a le Komiti mamalu o Malua, ua iu manua ai lenei faamoemoe.

O le aso 4 o Setema, na auai ai le Kolisi Faafeaga i Malua, i pesepesega faaleagaga o le faamanatuina o le 60 tausaga o le Tutoatasi o Samoa, na faia i le Maota o Tupulaga i Mulinuu. E momoli ai le faafetai tele i le Malo o Samoa, ona o le avanoa na valaunuina ai Malua e fai so latou sao mo lea faamoemoe taua. Ia manua tele le 60 tausaga o le tutoatasi o Samoa. E mauluga le viiga o le Atua, ina ua faataunuina i le manua le faauuga e avea ai ma Faifeau Samoa (FS), Susuga ia Fatilua ia Faletua ia Vaitiutuu, Susuga ia Tutotasi Toalima ma le Faletua ia Fetu; Susuga ia Clarke Stowers ma le Faletua ia Fofogalevai. Faamanuia tele le Atua i lo outou soifua ofoina mo ia.

O le aso 18 o Oketopa, o le tausaga nei, o le a talimalo ai le Kolisi o Malua, i se malaga asiasi mai a le Iunivesite o Otago mai Niu Sila. O le a sainiai ai i le feiloaiga, se feagaiga a Malua ma le Iunivesite o Otago, e faamautuina ai le sootaga e fefaaosoaa'i ai i le polokalame faa-le-aoaoga o Mataupu Silisili ma le Tusi Paia.

Ou te avea lenei avanoa, e fai ai le leo faatauvaa, ma sui o le Susuga i le Sui Pule, Faiaoga ma Faletua, A'oa'o, Faletua, ma le Kolisi i Malua, e momoli atu ai la matou faafetai tele, i le tofa faa-Tama o le Komiti o Malua – Toeaina Faatonu – ua ulimasaio ai pea le folaua a Malua i lenei vaitau e le faigofie. O taimi o le feagai ai o le Lalolagi ma mea e tutupu, e pei o faama'i. E le faagaloina ma le agaga faafetai tele, la outou tapuaga tatalo, o loo manua ai pea, le faaaauina o le faatinoga o polokalame fai a le Kolisi. E le faagaloina foi le tapuaga a le Eklesia Aoao, i Faafeagaiga, Aulotu ma Aiga.

O le tatalo faatauvaa, ia manuteleina faiva o loo feagai pea ma lo outou paia i Tama o le Eklesia. Tu ma leleia le ao e i le mamalu o le Eklesia Aoao. O se gagana ua sala a la outou auauna faapea lenei Lomiga, faamolemole faamagaloo, i lo outou alofa faa-Tama.

Tuuina atu i le ava ma le migao tele e tatau ai.

Vaitusi Nofoaiga

AMATA GALUEGA A LE KOLISI 2022

O le aso Lulu 9 o Fepuari sa atofaina e a'e ai le Kolisi e tusa ma lana kalena faaleausaga. Peitai ona o a'afiaga o le faamai o le Koviti 19, ma vavao o le malo na iai, na afua ai ona toe suia i le aso Lua 15 o Fepuari e amata ai. O lea aso i le itula e 7 i le afiaifi na faia ai le sauniga faapitoa e amatalia aloaia ai aoaoga ma galuega a le Kolisi mo le tausaga, ma faaaofia ai ma le vasega ulufale o aoao ma faletua, faatasi ai ma le faiaoga fou mo galuega i le Kolisi. O le Susuga ia Fatilua Fatilua ma le faletua ia Vaitu'utu'u. O Fatilua sa galue faa-faiaoga i le Kolisi Fa'a-faifeau o le Pasefika i Fiti, ma ua toe taliu mai o ia ma le aiga e fai ma faiaoga o le Kolisi i lenei tausaga. O lea sauniga na taitaia lava e le taitafono o le au-toeaina ma le Komiti o Malua, le Susuga i le Toeaina ia Asotasi Gu Time. E 27 alii aoao o le tausaga muamua, e aofia ai ma ulugalii e 15. O lenei vasega e aofia ai foi ma aoao sikolasipi e to'a lua ma o la faletua mai le Ekalesia Faapotopotoga Kelisiano Tokelau.

Sa faai'uina le afiaifi i se taumafataga na tapenaina e le Kolisi mo le paia i le Ekalesia, matua, aiga, uo ma e masani na afifio mai e molimauina le amataga o feau ma galuega a le Kolisi pei ona masani ai i tausaga taitasi. Na faai'u le po i le saunoaga faafetai a le Taitafono o le Komiti o Malua ma faamanuiaga mo le Kolisi aua le folauga o lenei tausaga 2022.

SA'AFIAFIGA MO REV. ELDER TAEIPO SAVEA MALIFA 08 Ianuari 1955—05 Aokuso 2022



O le masina o Aokuso 2022 sa fa'amavae atu ai le Ekalesia fa'apea le Kolisi Fa'aafaifeau i le susuga i le Toeaina ia Taeipo Malifa (KMTA), o le tamā o le kolisi i le saofaiga a le Komiti o Malua. Sa auai atu se tasi o faiaoga e fai ma sui o le Alii Pule ma le Kolisi i toe sauniga o le tamā.

O ona sauniga fa'aleāiga na faia lea i le aso 11 Aokuso 2022, i le malumalu a le EFKS Sydney i Lugarno. Sa ta'ita'ia lea sauniga e le susuga ia Luapene Nepo (FS) o le fa'afeagaiga a le EFKS i Afega, o le afioaga o le susuga i le Toeaina ia Malifa. O ona toe sauniga, na faia i le aso 12 Aokuso 2022 i le malumalu lava o le EFKS Sydney i Lugarno ma o le susuga i le Toeaina ia Asotasi Gu Time (Ta'ita'ifono - KMTA) sa avea ma ta'ita'i. O le susuga ia Kolia Kolia (FT) sa ia fa'aulufale mai le susuga i le Toeaina i le malumalu. O le susuga i le Toeaina ia Simeona Taefu (KMTA) sa saunia talosaga, a o le lauga na saunia lava e le ta'ita'i o le sauniga. Sa molimau le tina ia Sitaua, faletua o le Toeaina, o Leuluaijalii Tautalatasi Malifa e fai ma sui o lona aiga, fa'apea fo'i nisi o le aufaigaluega i le soifua auauna o le Toeaina i lona aiga, faapea le Ekalesia. O le sususga i le Toeaina ia Leaso Tupa'i (KMTA) sa saunoa e fai ma sui o le Ekalesia Aoao, e molimau ma faafetaia le auaunaga a le susuga i le toeaina, ma momoli ai le meaalofa mo le tina ma le fanau. O le susuga i le Toeaina ia Isa'ako Patea (FT) na ia fa'aiuina toe sauniga o le tamā i le tu'ugamau ma fa'atofā atu ai loa i le pese fa'atofā a le au Kerisiano.

Ae e avea ai lenei avanoa e fa'ailoa ai le agaga fa'afetai tele o le susuga i le Alii Pule ia Rev. Dr. Vaitusi Nofoaiga (FS) ma le faletua, le aiga faiaoga ma le laumua i le sao tele o le tamā i le Kolisi a o avea ma faiaoga, ae fa'apea tausaga e tele o alala i le saofa'iga a tamā o le ekalesia o loo fa'afoeina le sā o le Kolisi i le Komiti o Malua.

E manatua pea oe le tamā Malifa i le alofa ma le loto fa'afetai tele!

FAIAOGA TOE TALIU MAI

E toatolu Susuga i Faifeau Faiaoga Fomai ua taliu mai i le Kolisi i le tausaga 2022.

O le Susuga i le Faifeau Fomai Faiaoga ia Brian Kolia ma le faletua ia Tanaria ua faaiuina le taumafai i le sailiga o le faailoga o le PhD, sa avea ai ma sikolasipi a le EFKS i le University of Divinity, Melbourne. Ua toe taliu mai le Susuga a Kolia e faaauau le auaunaga i le Matagaluega o le Feagaiga Tuai. O le Susuga i le Faifeau Fomai Faiaoga ia Visesio Saga ma le faletua ia Angharad ua faamanuiaina foi le taumafai mo le faailoga o le PhD. O le Susuga ia Saga ma le faletua o le sikolasipi a le EFKS i le University of Divinity, Melbourne ma ua toe taliu mai e faaauau le auaunaga i le Matagaluega o le Feagaiga Fou. O le Susuga i le Faifeau Fomai Faiaoga ia Fatilua ma le faletua ia Vaituutuu sa avea ma faiaoga i le Pacific Theological College, Suva, ae ua taliu mai e galue i le Matagaluega o le Feagaiga Fou. E faafetaia ai le Atua ma lona alofa ona o tama fanau a lana Eklesia ua taliu manuia mai e faatino le soifua valaauna i le laumua i Malua.



FAAUUGA O LE FAAILOGA FOMAI



O le aso Faraile 3, Tesema 2021 na faataunuina ai le faauuga a le Susuga i le Faifeau Faiaoga Fomai ia Brian Kolia mo le faailoga o le PhD. Ona o aiaiga o tapu o le faamai o le Koviti sa le mafai ai ona faatino le faauuga e pei ona masani ai, peitai sa faia lava i luga o upegatafailagi (virtual graduation).

O le tusiga a le Susuga a Kolia mo le faailoga o le PhD ua faaulatalaina o le: “Maota Tau Ave: Towards a Diasporic Australian-Samoan Understanding of Wisdom in Ecclesiastes.” O lenei tusiga sa faia i lalo o le taitaiga a Professor Mark Brett ma Rev. Dr. Jione Havea. Sa molimauina le faamoemoe o le Susuga ia Kolia e le Susuga i le Toeaina ia Aviti Etuale, o ia foi sa fai ma sui o le Komiti a Malua i le faauuga.

O le Susuga ia Kolia na filifilia na te saunia le tautalaga faailogaina o le faauuga (valedictorian speech) ma e faafetaia ai pea le alofa o le Atua ona ua a'e manuia le faatamasoaliiga a le Susuga i le Faifeau Fomai Faiaoga ma le Faletua ia Tanaria. Tautai a'e!



AOGA TUSI PAIA MALUA 2022

E faatalofa atu i le Suafa o lo tatou Alii o Iesu Keriso i le mamalu o le Ekalesia Aoao ua potopoto mai mo lana Fono Tele 2022.

O le masina o Fepuari sa toe amatalia ai polokalame a le Aoga Tusi Paia e pei ona masani ai i tausaga taitasi. O le taimi nei ua tolu lālā o le Aoga Tusi Paia a Malua o loo faatinoina ai vasega. O Samoa (Apia ma Salelologa, Savaii), Sini (Ausetalia), ma Aukilani (Niu Sila).

O loo gasolo lelei lava aoaoga ma vasega i lālā nei e tolu. O loo molimauina le sologa lelei o aoga ma vasega i Apia ma Salelologa. O loo lelei lava le fuainumera o sui aooga i Apia, a o Salelologa ua tau maulalo le aofai. Masalo o le aafiaga o sa ma vavao o le koviti ua mafua ai. A o loo iai lava le naunautaiga ina ia toe faaolaola le numera o sui aooga i Salafai pe a toe amatalia le Kuata 3 faapea ma le tausaga fou.

O le tausaga foi lenei na amata aloaia ai aoaoga i Aukilani, Niu Sila i se sauniga faapitoa. Na taitaiina lava e Susuga i Toeaina o Matagaluega a Aukilani ma Manukau, faapea le lagolagosua a Faafeagaiga ma sui o Ekalesia taitasi na auai ai i lea aso. Na mafai foi ona auai atu i lea faamoemoe taua le Susuga i le Alii Pule ma Faiaoga o le Kolisi i Malua i auala faaonapo nei. O loo molimauina foi le toatele o sui aooga ua lesitala ane mo vasega i Aukilani.

O loo faapena foi le gasologa o aoga ma vasega i Sini, Ausetalia. E ui ina uftia le Ekalesia i le ao pogisa ona o le tuua ai o le malo e le Susuga i le Faifeau Toeaina ia Malifa Taeipo Malifa (FT), o lē sa taulamua i le faatuina ma le faagaioiina o le Aoga Tusi Paia i Sini, ae o loo faapea lava ona sologa manuia vasega ma le aoga i Sini.

E avea ai foi lenei avanoa e faafetaia ai le sao tele a le Susuga i le Toeaina ia Malifa i le faagasologa o le Aoga Tusi Paia i Sini. Ia maua pea e le Faletua ma le nofoaalo, faapea le Ekalesia le mafanafana o le Alii ona o le tuua ai e lana auauna aoga ma le taua o le mafutaga nei.

O le aotelega lava o le gasologa o le Aoga Tusi Paia, o loo faapea lava ona lelei. E faaleoina ai le faafetai tele a le Susuga i le Alii Pule ma Faiaoga i le lagolago malosi a Susuga i Toeaina ma Faletua, Faafeagaiga ma Faletua, faapea le loaloa o le Ekalesia, ua manuia ai le gasologa o le Aoga Tusi Paia. Ia faamanuia tele le Atua.

E faapitoa lava se faafetai i le Matagaluega a Faasaleleaga, Susuga i Toeaina ma Faletua, Faafeagaiga ma Faletua, faapea le paia o le Matagaluega i ona tulaga faalupe, ona o le lagolago, fesoasoani, ma le tausiaina o le aufaigaluega faiaoga e autovaa atu i Kuata taitasi mo le faatinoga o vasega. Ia faamanuia tele le Atua i lo outou alofa tausi.

Ia manuia tele le feagai ai o le Ekalesia ma ana fonotaga o faagasolo i le alofa o le Atua.

Makesi Neemia.

Sooupu, Aoga Tusi Paia a Malua

SAMOA JOURNAL OF THEOLOGY

Lipoti Puupuu o le Tuufaatasiga o le Samoa Journal of Theology – SJT Launch (15.06.22)




Ua maea ona sii le faamua i le Atua, e ala i le tapuaiga e pei ona sa fitaituga iai, le Afioga i le Taitaifono o le Komiti o Malua, o le Taitaifono o le Komiti a Toeaina, Tama o le Ekalesia. Le Susuga i le Toeaina, Asotasi Gu Time. Momoli mai le feau faamalosiau mo le tatou folaua faa-le-faatuatua i le feau a le Atua. O le tatalo, e pei ona saunoa le fofoga o le aso, ia saga utupupuina pea e le Atua, i le oa faa-le-agaga, Lau Afioga i le Taitaifono, aua tiute ma faiva e tele, o loo feagai ai, mo le Ekalesia.

Ua maea foi ona saunoa faafeiloai atu le Susuga i le Faifeau Fomai Faiaoga ia Samasoni Alama, o le Sooupu o le Samoa Journal of Theology, e fai ma sui o le Komiti o le Samoa Journal of Theology, ma Malua nei, e faafeiloai le paia ma le mamalu tauee, o faatumutumuga o le Ekalesia ma le Kolisi o Malua, ua aualititia ai Malua i lenei taeao matagofie. O le a ou le toe sii ai se isi matalalaga, ae o le a aga'i loa le tautalaga, e fai ai lo'u faatauvaa e fai ma sui o le Susuga i le Alii Pule ia Vaitusi Nofoaiga, i se tala puupuu i le agaiga mai o le faamoemoe o le tusitusiga faa-va-o-malo a Malua, o le Samoa Journal of Theology, e pei ona iai lenei aso.

O lenei faamoemoe, o se miti ua leva a le au-faigaluega i Malua nei. Sa faa-nono-manu lava i le Atua, i le tatalo, mo se taimi talafeagai e faatino ai lenei miti.

Ina ua a'e se lagona e faia le polokalame o le Master of Theology i Malua nei, na manatu ai, o le tali foi lea mai le Atua, o le taimi tonu lea e faatino ai loa le faamoemoe lea, o le tusitusiga faa-va-o-malo tuuvasolo a Faiaoga Malua ma le Ekalesia. O se faatinoga e taua tele, ina ia avea ai o se tusitusiga e o faatasi ma le polokalame o le Master of Theology, ua a'o'a'oina i Malua i le taimi nei. Na mautinoa o le finagalo lea o le Atua, ina ua aumai le faamanuia a le Komiti o Malua, o Tama o le Ekalesia, ina ia manuia le faatinoga o lea faamoemoe, e pei ona molimauina i le aso.

SAMOA JOURNAL OF THEOLOGY (faaaauau mai le itulau 4)



O le mea moni, e le tupu le faataunuina o lenei faamoemoe ma lenei miti, pe ana le seanoa le taitaiga ma le fesoasoani mai o le Atua, na ala mai i la outou tapuaiga, o la outou lagolago, lo outou paia i Tama o le Ekalesia, le Komiti a Malua, faapea le Ekalesia.

Na iai le fuafuaga e tatalaina lenei faamoemoe i le Fono Tele o lenei tausaga, e pei ona sa folasia e le Pule i lana lipoti faa-le-tausaga i le Fono a le Komiti mamalu o Malua na faia ia Januari o le tausaga nei. Ae ona o tapu o le faama'i, na lē faataunuina ai le Fono Tele i le masina o Me, na lē faataunuina ai foi, le tatalaina o le tusitusiga lenei a Malua.

Peitai ua manatu le Alii Pule ma le aiga a faiaoga, e faataunuu pea le faamoemoe, pe a tatala tapu o le faama'i, ina ia faaaauau pea le faagasologa ma le faataunuina o polokalame faataoto a le Kolisi ma lenei tausaga. Na tasi ai e faataunuina lea faamoemoe i le aso, 15 Iuni 2022.

O le tasi o mafuaaga ua faataunuu ai lenei faamoemoe, ina ia mafai ona faaaoga e a'oa'o tusitusiga o loo iai i totonu o lenei lomiga, īā latou tusiga-pepa (Thesis), o loo galulue ai i le taimi nei, i polokalame o le BTh, BD Hons, ma le Master.

O le faatinoga o lenei lomiga muamua sa feagai lava ma le Alii Pule ma Faiaoga o le Kolisi, e pei ona iai tusitusiga uma o loo i totonu o lenei lomiga.

O le Susuga i le Pule, ia Nofoaiga ma Samasoni Moleli Alama, o faatonu ia o lenei tusitusiga, e faia le tuufaatasiga mulimuli. E siaki ma toe faatonutonu ni vaega e tatau ona faaleleia atili, ina ia o gatasi ma mataupu silisili a le Ekalesia, faapea tu ma aga faa-Kerisiano, ma le faa-Samoa, e amanaia e tagata lautele.

E faia uma ia faatinoga, ina ua fo'i mai tusitusiga ta'itasi mai se iloiloga e nisi o tagata su'esu'e o le lalolagi, i mataupu o loo talanoaina i tusitusiga ta'itasi. O ia tagata su'esu'e o loo ta'ua o latou suafa o se 'Laulau Faatonu' (Editorial Board) o le tusitusiga lenei a Malua. O lona uiga, e le fesiliglia le amanaia o le taua o le sao lenei o Malua ma le Ekalesia, e ala atu i lenei tusitusiga tuuvasolo, i mataupu e aafia ai le faauigaina o le Tusi Paia, o le Mataupu Silisili, o le Tala Faasolopito o le Ekalesia, ma le Galuega Faa-Faifeau, mai o tatou lalolagi faa-Ekalesia ma le faa-Samoa, i le fesootaiga ma isi tagata o le lalolagi.

O se tusitusiga faasolo lenei (Samoa Journal of Theology), o se tusitusiga muamua lea faa-va-o-malo mai le Pasefika, i suesuega faa-le-Tusi Paia, faa-le-Mataupu Silisili, Talafaasolopito o le Ekalesia, ma le Galuega Faafaifeau, ua faatino i faiga faasuesuega faa-va-o-malo e pei ona taua i luga.

Matou te avea ai lenei avanoa, e momoli atu ai lo matou agaga faafetai tele, i lo outou mamalu, Lau Afioga i le Taitaifono o le Komiti o Malua, Lau Susuga i le Failautusi o le Komiti Mamalu, Sui Mamalu o le Komiti, i le paia o le Laulau o le Fono Tele, Lau Afioga i le Taitaifono, Afioga i le Sui Taitaifono, Susuga i Toeaina o Mataupu tau le Aufaigaluega. Faafetai i le Tofa Faa-Tama, sa outou talisapaia ai, e pei ona iloa i la outou faamanuia, le taliaina o lenei faamoemoe. Faafetai tele i la outou tatalo ma le tapuaiga, e le gata ua taumanuia ai lenei faamoemoe, ae o le gasolo manuia ai pea, o faiva ma polokalame fai a Malua. O le galuega ua tino mai, o se tasi lea o faatinoga o le galuega faa-misionare faaaauau a le EFKS, e faasoa atu le Talalelei, e le gata i Samoa nei ma le Pasefika, ae faapea foi le lalolagi. O la outou pule lea, faafetai tele.

Ae ou te fia avea foi lenei avanoa e momoli ai le faamalo ma le faafetai i lau Susuga i le Alii Pule, Lau Susuga i le Faifeau Fomai Vaitusi Nofoaiga, ona o lau taitaiga, aemaise le faamalosi ma le faamaite o mea lelei, ao taumafai ai lenei galuega, lea ua tino mai ai lenei faamoemoe lelei ua molimauna e Tama o le Ekalesia i lenei taeao.

O le tatalo a Malua, ia saga foai pea e le Atua i lo outou mamalu, i Tama o le Ekalesia, le malosi i le tino, i le mafaufau, ae sili i le agaga, aua le taitaiina o le Ekalesia, faapea ai lana Kolisi Faafaifeau.

Tuuina atu ma le ava tele.

Faafetai.



FAAUUGA O FAIFEAU SAMOA

Fatilua & Vaitutuu Fatilua, Tutoatasi & Fetu Toalima, Clarke & Fofogaolevai Stowers

O le Aso Toonai 24 o Setema, 2022 na faataunuina ai le sauniga lotu faapitoa i le malumalu "O Le Fale Iupeli", e faauina ai Faifeau Samoa ma Faletua e 19. O i latou ua agavaa mo le tautuaina o le Upu ma le Sakarameta a le Atua e ala i le avea ma Faifeau ole EFKS, poo le tofiga Faifeau Samoa (FS). O lenei lava faamoemoe, sa faauina ai foi nisi o Faiaoga Malua. O le Susuga ia Fatilua Fatilua ma le Faletua ia Vaitutuu, le Susuga ia Tutoatasi Toalima ma le Faletua ia Fetu, faapea le Susuga ia Clarke Stowers ma le Faletua ia Fofogaolevai. O lenei sauniga na taitaiina e le Susuga i le Toeaina ia Siolo Tauati; fatauina o le Tusi Paia o le Susuga i le Toeaina ia Misipalauni Faatau; o talosaga e faapaia ai tofi na saunia e le Susuga i le Toeaina ia Ailepata Ailepata; ma le Susuga i le Toeaina ia Leaso Tupai na fofogaina Suafa o Susuga i Faifeau ma Faletua faau'u.

O Susuga ia i Toeaina na fai ma sui o Tamā o le ekalesia e faae'e o latou aao i Faifeau faau'u. O le Susuga i le Taitaifono o le Fonotele ia Iosefa Uilelea; le Susuga i le Taitaifono o le Komiti o le Au-Toeaina ia Asotasi Gu Time; le Susuga i le Sui-Taitaifono ia Tunumoso Iosia; le Susuga ia Siolo Tauati ma le Susuga ia Fili Matalavea.

Sa vaiai le sagisagi fiafia mai o aiga ma aulotu, e tapuaia ma lagolagosua i lea faamoemoe taua a le Ekalesia. Auā o se faamoemoe o loo tulimata'i uma e aoao ma faletua o loo iu mai le laumua ina ia ausia. O le Susuga ia Fatilua o loo galue i totolu o le Kolisi i le Matagaluega ole

Feagaiga Fou. O Susuga i Faiaoga ia Tutoatasi ma Clarke o loo i le Matagaluega o le Talafaasolopito o le Ekalesia. O moomooga ma alofaaga a le Susuga ile Alii Pule ma le Kolisi, ina ia manuia le tulai mai o Susuga i Faifeau Faiaoga ma Faletua ma aiga i lea laasaga taua ole soifua tautua i le Atua, e ala i le ola valaauna i totolu ole Kolisi faapea le Ekalesia.



Susuga Fatilua &
Vaitutuu Fatilua (FS)



Susuga Clarke &
Fofogaolevai Stowers (FS)



Susuga Tutoatasi &
Fetu Toalima (FS)

MASTERS PROGRAM



E tulaga ese lenei tausaga i le Talafaasolopito o le Kolisi Faafaifeau i Malua ina ua tino mai se tofā a nai tamā o le Ekalesia i le amataina ona sue ma saili le faailoga taualoa o le Master of Theology i le Kolisi. E leai se mea e faigofie, ae o le mana lava o le Atua le Tamā na taitaitama ua sologa lelei ai le amataina o le faamoemoe. E lua vaega o loo vaevaeina i ai le polokalame. O le vaega muamua e tasi le tausaga. O i latou nei o loo umia faailoga taualoa o le BD with Honors ma o loo iai le faamoemoe e faauina i le faaaiuga o lenei tausaga. O le vaega lona lua, e lua tausaga ma o i latou nei o loo umia faailoga taualoa o le BTh. O le tausaga muamua e faagasolo ai a latou mataupu ma tapena ai mo le faatautaiga o ā latou tusiga i le tausaga lona lua. I lona aotelega, e 13 faifeau ma aoao i'u mai Malua ma le aoao i'u mai le Seminale i Kanana Fou ua amata ai le polokalame i lenei tausaga. E toafitū o loo i le vaega muamua e aofia ai faifeau tausinuu e toalua, faifeau mai Kiribati (Kiribati Uniting Church) e toalua, ma aoao i'u mai Malua e toatolu. E toaono o loo i le vaega lona lua o le polokalame e aofia ai le faifeau o loo faigaluega i Matagaluega a le Ekalesia, o a'oa'o e toafa i'u mai Malua ma le aoao i'u mai le Seminale i Kanana Fou. E tele luitau o loo feagai ma le tau amataina o le polokalame ae le gata i lea o aafiaga ona o mea e tutupu i le soifuaga. Ae o le alofa lava ma le taitaiga a le Atua o loo sologalelei ai le faatautaiga o le polokalame e le Susuga i le Alii Pule, Sui Pule ma le aiga Faiaoga. O loo sologa lelei foi taumafaiga a faifeau ma aoao. Talosia ia o gatusa ma le finagalo o le Atua ia i ai nisi e ausia ma mae'a galuega faatino auā le faauuga i le faaaiuga o le tausaga. Ia maua foi se 'ai mo Malua, faapea le Ekalesia aoao, le tapuaiga a aiga, faapea nuu ma nai aulotu. Ae silisili ai ona fai ma viiga o le Atua.

Soifua ma ia manuia
Arthur Wulf



ITULAU A FAIAOGA


GOLF TOURNAMENT

O le Fonotele i lenei tausaga i le aso Faraile 23 o Setema, sa faataunuina ai se taaloga tapolo faavaomalo i le va o le Kolisi o Malua ma le au a Manukau/Aukilani, i le malae tapolo i Faleata. E 27 au taitoalua na tausiniō i lea aso, e aofia ai au e 13 a Malua, ma au e 14 a Manukau/Aukilani. O le au sa pitomaulalo lo la ta i lea taaloga (best gross) o le au a Susuga i faafeagaiga ia Meki Lauvi ma Faafetai Milo. Peitai i le tuufaatasiga o ai, na siamupini ai le au a Malua i le taamilosaga o lenei tausaga. E momoli atu ai le faafetai tele a le komiti i au uma e lua, mo le taaloga matagofie o lea aso. E faafetaia foi le Vodafone Samoa mo le tapenaina o le toniga a le autapolo a Malua sa faaaogaina mo lea taaloga.



TALANOA OCEANIA 2022 (SEMINAR)

E to'afa faiaoga Malua na maua le avanoa e faasoa ai a latou pepa i le Talanoa Oceania 2022. E lua aso o le “Talanoa”, Setema 10-11, ma na talimalo ai le Trinity Methodist Theological College, Auckland, Aotearoa. O le Susuga ia Brian Kolia (Matagaluega o le Feagaiga Tuai) ma Fatilua Fatilua (Matagaluega o le Feagaiga Fou) na maua le avanoa e malaga atu ai i Niu Sila mo le faamoemoe. Peitai o le Susuga ia Arthur Wulf (Matagaluega o le Feagaiga Tuai) ma Alesana Palaamo (Matagaluega o Faivaalofilima o le Mataupu Silisili) na le mafai ona auai atu ona o mafuaaga le maalofia, ae na mafai lava ona faasoa a la pepa i luga o le zoom. E momoli atu ai le faafetai tele i le Susuga i le Alii Pule ma le faletua, tainane o le



Kolisi o Malua mo le lagolagoina o lea faamoemoe taua tainane o le tapuaiga a o alofaiva Susuga i Faifeau Faiaoga Fomai. O pepa ma ulutala na faasoa:

Alesana Fosi Pala'amo – O le pepa ua faaulatalaina: Grounding our theology as frontline faifeau (minister) & faletua (minister's wife)”

Arthur Wulf – O le pepa ua faaulatalaina: “A Tagata Folau Reading of Genesis 1”

Brian Kolia – O le pepa ua faaulatalaina: “Judas greets Jesus with a sogi/hongi?: A Talanoa of Judas’ kiss in Mark 14 with the kiss in Song of Songs 8:1” [in person]

Fatilua Fatilua – O le pepa ua faaulatalaina: “A moment of ‘tasi ae fo’i atu le saunoaga’? Re-situating the encounter between Jesus and the Syrophoenician woman within Samoan rhetoric”

MAFUTAGA A LE KOLISI

RIPOTI MAFUTAGA A'OA'O MA FALETUA

I le ava ma le faaalaloalo tele e tatau ai, e tu'uina atu ai le ripoti pu'upu'u o le Mafutaga a A'oa'o ma Faletua i lenei tausaga 2022. E 174 le aofaiga atoa e aofia ai le Tausaga Muamua e 40, Tausaga Lua e 45, Tausaga Tolu e 45, ma le Tausaga Fa e 44.

O le lu'itau tele o lenei tausaga o le faama'i Koviti-19 ma tapu a le malo na a'afia ai a'oa'oga ma polokalame o le tausaga. Peita'i na sologa lelei mea uma i galuega fai ma polokalame faaaauau i le alofa tausi mai ma le agalelei o le Atua. O nisi o galuega e aofia ai pesepesega a le akapela i le Faafouina ma pesepesega faaleagaga mo le faailogaina o le 60 tausaga o le Tuto'atasi o Samoa 2022.

Sa faaaauau pea galuega a le 'au kamuta i le faaleleia o maota o Faiaoga ma faleaoga, o le pa pa'epa'e, Women Center ma isi fale. Sa galulue foi i le pa teuteu o loo si'o ai le Fale Mafutaga ma le Faletusi a le Kolisi.

O loo sologa lelei pea galuega a le vaega o le papovi ma le Samoa land i le tausiga o manu papalagi, ma'umaga ma meatuaolo a le nu'u. O se tasi o galuega tau amata o le toe totōina o niu ona ua paoga ma matutua le togāniu a le Kolisi.

O le tasi o galuega ua amatalia e le vaega a le Aute o le faafaileina lea o le aute pa'epa'e mo le fa'amoemoe e totōina i lumafale o le Kolisi i se taimi o lenei tausaga. O loo faaaauauina pea le galuega a le Faatamā ma le Aiga nofo to'atasi i le teuteuina o lo latou nofoaga i pa laau matagofie. O loo sologa lelei foi galuega a le Canteen auā oloa e moomia e le nu'u. I le vaega o taavale ma fela'uai'ga, na faatauina e le Kolisi le Van Toyota 15 nofoa ma le pasi Toyota Coaster fou e 30 nofoa mo le faamoemoe lava ina ia mautu le auaunaga mo alo ma fanau a le Kolisi ma nisi fuafuaga e mo'omia ai. Ua maea tapena foi le vaega a le IT mo auaunaga e faaaogaina ai le tekonomosi o fesootaiga i taimi o tapu o le Koviti-19. O nei auaunaga e aofia ai faiga lotu ma aoga e faaaogaina ai le ZOOM. E le gata i le Kolisi, ae ua faatino foi nei auaunaga mo fonotaga a le Ekalesia e pei ona mo'omia ai le fesoasoani a le IT a Malua.

Ua maea le poloketi a le Tausaga Faaiuaso 2022 i le toe faaleleia ai o le ata o le pine ma le igoa o le Kolisi i lumafale. O le poloketi e aofia ai le suaina ma le tanuina faamaualuga o le tulaga o le igoa ma totoina ai le vao palagi. Ua maea foi ona faasimāina lelei mata'itusi o le igoa. Sa faatupeina lava e a'oa'o ma faletua o lenei vasega le poloketi.

E iai foi tiute a Faletua e pei o le teuteuina o le Malumalu tapua'i, o pa la'au ma le faamatagofieina o le aai. E faapea foi i so'o se taligā malo a le Kolisi, e pei fo'i o le tapenaina o potu e tofafā ai tamā o le Ekalesia i le taimi o mafutaga Faafouina ma Fono Tele i tausaga uma.

E toatasi le A'oa'o ma si ona Faletua na faase'etuagal i le vaiaso muamua o le aoga ona o gasegase o le tino e o'o mai lava i le taimi nei, a o le aotelega o le Mafutaga o loo manuia mea uma. O se faailoga lelei lea o le gasologa o feau ma galuega o lenei tausaga ona o le faatasi mai o le Ali'i.

Fa'afetai

Laulau a le Mafutaga

Peresitene – Pelenato Liufau ma le Faletua ia Susana Gutu Liufau.

Failautusi – Fa'afetai Koria ma le Faletua ia Jeddah Leavai Koria



Pelenato ma Susana Liufau



Faafetai ma Jeddah Koria



TAALOGA A'OA'

O Aso Tofi o vaiaso ta'itasi, ua atofaina o se aso ta'alo po o le aso lea mo polokalame ta'alo a le Kolisi. O le fa'amoemoe, ia maua avanoa e saili ai se fa'amalosi tino a o se fa'asiliga malosi i luga o malae ta'alo. Ia mafai foi ona malōlō mai i feau ma galuega fa'atino, fa'apenā foi i totonu o potu aoga. O le Susuga i le Faifeau Fomai Faiaoga Taipisia Leilua, o le ta'ita'i komiti, fa'atasi ai ma le lagolagosua a le Susuga i le Faifeau Fomai Faiaoga Samasoni Moleli, ma le Susuga i le Faifeau Faiaoga Olive Samuelu, o isi ia o komiti filifilia i le vasega o Faiaoga.

MAFUTAGAA LE KOLISI

E to'afā a'oa'o fa'aiuso ua tofia e fai ma komiti, o Collin Faletoese, Limuaa Fu'e, Otele Vaai ma Joshua Leatigaga. E lua 'au ua vaevaeina ai mo ta'aloga i lumāfale, o le Uliuli (Black) ma le Pa'epa'e (White). O ta'aloga e fa'atinoina e pei o le Lakapi Pa'i (Touch Rugby) ma le Soccer, ma ua vaevaeina tutusa iai a'oa'o o tausaga ta'itasi, mai lava i le Tausaga Muamua, seia oo atu i le Tausaga Fa. E fa'apea foi ona tofia iai Susuga i Faiaoga latou te ta'ita'ia 'au taitasi. E felafoa'i lava le i'uga o ta'aloga i vaiaso taitasi, o le ata manino o le finau ma le tauivi, e lē gata i a'oa'o ae fa'apea foi se taumafai mai a Susuga i Faiaoga.



Mo ta'aloga i tuāfale, o le Kirikiti Samoa, ma ua fa'apea foi ona vaevaeina i 'au e fā. O le lanu samasama (yellow), lanu moana (Blue), lanu mumū (Red), ma le lanu meamata (Green). O loo fa'apea foi ona auai le fa'amalumaluga a le Susuga i le Alii Pule ma le Aiga Faiaoga i 'au taitasi. E iai foi 'au Kirikiti fa'a-pitonuu ua lautogia mo ta'aloga a pitonuu, o le 'au a Tofuola ma le 'au a Lomitusi. I le taimi nei o lo o umia e le 'au lanu meamata (Green) le talitā, po o le Siamupini o ta'aloga Kirikiti, fa'apea foi i le 'au a Tofuola mo ta'aloga fa'apitonuu.

E fa'afetaia ai le ta'ita'iga ma le fa'amalumalu a Susuga i faiaoga, ona e maitauina pea le sologa lelei ma le matagofie o Polokalame ta'alo a le Kolisi i vaiaso uma. Ae sili ona viia le Suafa o le Alii, i lona agalelei i lenei fa'amoemoe.

Ma le Agaga fa'aaloalo,
Komiti o Ta'aloga 2022.



TAALOGA A FALETUA

E pei ona sa sau ai i tausaga ua mavae, o Aso Tofi o vaiaso ta'itasi, ua fuafuaina mo taaloga e pei o le volipolo ma nisi o faamalositino a le mafutaga a Faletua. O le faamoemoe lava ina ia maua le soifua maloloina a o se faasiliga malosi mo Faletua ina ia le gata ai o le aoaoina i totolu o potu aoga a ia mautu foi tapenaga uma i nisi vaega o le feau ma le galuega. O lenei polokalame o taaloga o loo i lalo o le taitaiga a le Faletua o le Faiaoga ia Maria Samuelu, faatasi ma le lagolagosua a le Faletua ia Vaituutuu Fatilua.

E fa ni 'au sa vaevaeina i ai le mafutaga a Faletua o le Kolisi. O le 'au Lanu Moana o loo i lalo o le taitaiga a le Faletua o le Alii Pule, Mile Nofoiga, faatasi ai ma le lagolagosua a le Faletua ia Malavai Moleli, Pauline Esera, ma Angharad Saga.

O le 'au Lanu Meamata o loo taitai ai le Faletua o le Susuga i le Sui Pule ia Torise Neemia faapea ma le lagolagosua a Josephine Faalili, Fetu To'alima ma Vaitu'utu'u Fatilua.

O le 'au Lanu Mumu o loo i lalo o le taitaiga a le Faletua ia Maria Samuelu ma Vaisola Leilua, faatasi ai ma le lagolagosua a Faletua ia Tuluiga Ipiniu ma Fofogaolevai Stowers.

O le 'au Lanu Piniki o loo i lalo o le vaavaaiga a le Faletua ia Sina Wulf, faatasi ma le lagolagosua a le Faletua ia Lemau Palaamo, Panorama Setu ma Tanaria Kolia.

I le mae'a ai o le Semester 1 o loo tulaga tutusa le 'au Lanu Moana ma le 'au Lanu Mumu i togi e maua i taaloga.

E le gata foi i taaloga ae o loo tausino foi Faletua i le polokalame o le fuaina o le mamafa i totolu o le lua vaiaso. O lenei polokalame e faamoemoe e faamae'aina i le faaiuga o le tausaga ma maua ai se tasi ua manumalo. O le faamoemoe lava ina ia faatauaina pea le taumafa i meaai paleni ma ia maua le soifua maloloina lelei.

Ia saga viia ai pea le Atua ona o le malosi ma le soifua laulelei o Faletua o le Mafutaga i totolu o le Laumua i Malua.

Faafetai,
Olivia Upulasi



AOAOGA A LE FANAU

AOGA ASO SA

E faatalofa atu le Aoga Aso Sa i le suafa mamalu o Iesu Keriso le Ao ole Ekalesia. O le viiga i Le Atua ona o lona alofa ma le tausiga i lo outou soifua aemaise o so matou ola, o loo maua ai pea le malosi e faaaauau ai o tatou valaauina eseese.

O lenei Aoga Aso Sa o loo i lalo lava ole taitaiga a le Susuga i le Alii Pule male Faletua Rev Dr Vaitusi Nofoaiga ma Mile faapea male lagolago a Faletua o Faiaoga faatasi ai ma Faaiuaso i aoao ma faletua

Ole aofai o faiaoga , o Faletua o Faiaoga e 9, aoao ma faletua Faaiuaso, 24 Aoao ae 18 Faletua

Ile taimi nei ole aofai ole Aoga Aoga Aso Sa o loo iai ne e tuna male 162 e 75 alii ae 87 tamaitai

Vasega Amata	60 (35 alii/ 25 tamaitai)
Vasega Laiti	43 (20 alii/23 tamaitai)
Vaega Feololo	31(13 alii/ 18 tamaitai)
Vasega Matutu	18 (9 alii / 9 tamaitai)
Vasega Matutua Faapitoa	10 (4 alii/ 6 tamaitai)

E tolu kuata faale aoaoga ua vaevaeina iai lenei aoga faatasi ai ma faiaoga Aso Sa.

Ole kuata muamua sa filifilia ai le susuga ile Faaiuaso ia Joshua Leatigaga e avea ma failautusi. O le kuata lona lua sa avea ai le susuga ia Collins Faletoeese ma Failatusi ae ua tofia lou faatauvaa e faamaeaina le vaega o totoe o le tausaga male lagolago a aoao ma faletua Faaiuaso uma.

O loo sologa lelei le gasologa ma polokalame o aoga a le fanau sei vagana ai le taimi na aafia ai ile Koviti 19 na taofia ai aoga ma polokalame uma ona o puipuiga lava ole faamai male ola o nai fanau.

I le taimi nei o loo feagai ai ma tapenaga o lo latou Aso Sa Faapitoa I lenei tausaga

Ia alofagia pea e le Atua ia apoapoina pea ma laveaaina le ola o nai fanau mai faamai pepesi ma ia maua pea lo latou malosi aemaise ole taitaiga ile Susuga ile Alii Pule ma le Faletua, le lagolago a Faletua o Faiaoga ma Vasega Faaiuaso 2022 i aoao ma faletua.



Male faaaloalo tele
Mika Suesue Teo

LITERACY / FALETUSI MO TAMAITI MALUA 2022

Faafetai i le Atua ua maea le matou polokalame mo nei kuata e lua o le tausaga. O le faamoemoe o lenei polokalame faitau tusi a le fanau, o le fesoasoani ma faaleleia le faitau o alo ma fanau, i le gagana Peretania. Na amata le polokalame mo lenei tausaga i le aso 27/02/22. O ta'ita'i o le polokalame o faletua faiaoga ia Malavai Moleli, Pauline Esera, Panorama Tavita ma Lemau Pala'amo. E valusefulu ma le fitu (87) tamaiti o le Literacy program a Malua. Mai le amataga o le tausaga, sa tele le taimi o nei kuata e lua e le'i mafai ona fa'ataunu le matou polokalame, ona o tapu ma vavao i le pepesi ai o le fa'ama'i o le koviti-19 iinei i Samoa faapea ma Malua. Peita'i, sa fesuia'i pea tusi a le fanau i se faiga talafeagai ma vavao, ina ia fa'auau pea le polokalame e ui ua lē o toe potopoto faatasi i le women's centre. Sa to'atele fo'i le fanau e fiafia lava e fesuia'i a latou tusi i faletusi a le fanau i vайасо таитаси.

Matou te faafetaia pea le agalelei o le Atua ona o auala eseese sa maua mai ai tusi fou o alo ma fanau a Malua. E faamauina ai le faafetai i le Susuga Toeaina Pouniu Fa'amausili ma le faletua ia Aniva, auā le tele o tusi fou sa foai ma lafo mai mo le Literacy program a Malua. E faapena ona faamauina le faafetai i le Susuga Fa'afeagaiga Filemoni Crawley ma le faletua ia Alofa ma le fanau mo le seleni e fesoasoani i le matou polokalame. Faafetai fo'i i le tamaitai ia Vai Upulasi i le tele o tusi sa ia foa'iina mo le faletusi a le fanau. Sa agalelei mai foi le Kolisi i Malua e tauala i seleni mo le fa'atauina o bookshelves, filing cabinets, penitala, folders, api faapea ma tusi fou. O le matou tatalo, ia faamanuia tele le Atua ia i latou uma sa agalelei mai mo lenei polokalame, ma ia toe fa'atumu le foa'i ua fa'agaogaoina ona o lenei polokalame taua mo fanau a le Kolisi.

O loo talia pea ma le agaga faafetai le foai mai o tusi fou, ma sponsorship auā lenei polokalame tāua mo fanau a le Kolisi. E faamoemoe lava ma tatalo i le Atua mo le fesoasoani mai ina ia faaaauau lenei polokalame i le lumanai mo latou uma o loo fai mai i le Kolisi . E faafetaia pea le Alii Pule o le Kolisi i Malua ma le Faletua, o Faiaoga ma Faletua o Faiaoga, faapea mātua o fanau uma o lenei polokalame, auā le lagolagoina ma le tapuaia o galuega faaaauau o le polokalame mo lenei tausaga. E faafetaia foi Faletua o Aoao o loo fesoasoani tele i le fa'amaopoopooina o lenei faamoemoe. Ia manuia tele le Fono Tele mo lenei tausaga.

Faafetai ma Alofaaga,
Lemau Pala'amo

FAAMULI OLE ESETA—TAUSAGA MUAMUA

Magalo le leo vaivai ae sei otooto se tala i le faamuli a le Tausaga muamua i Aoao ma Faletua i le vaiaso o le Eseta, 15-17 Aperila 2022. O le Susuga i le Alii Pule, Rev Dr Vaitusi Nofoaiga ma le Faletua ia Mile Nofoaiga na ta'ita'ia le faamuli, faatasi ai ma le lagolago malosi mai a le Peresetene o le Mafutaga a Aoao ma Faletua, Pelenato Liufau faapea foi Faafetai Koria (Failautusi Mafutaga Aoao ma Faletua), Hobert Sasa (Faaiuaso), ma Falevaai Ah Kuoi (Faaiuaso).

E luasefuluono (26) le aofaiga o Aoao ma Faletua o le Vasega a le Tausaga muamua 2022. Sefululua (12) ua faaipoipo ae 16 Aoao nofo to'atasi e aofia uma ai Niu Sila, Ausetalia, Hawaii, Amerika ma Samoa faatasi ai ma aoao sikolasipi mai Tokelau e to'aluia ma o la faletua.

O le sauniga i le Aso Faraile o le Eseta, na ta'ita'ia e le Susuga i le Alii Pule, Rev Dr Vaitusi Nofoaiga, faatasi ai ma le Sauniga paia o le Faamanatuga. Sa faatinoina uma lea sauniga i luga o fesootaiga faaonaponei o le Zoom ona o le feagai ai ma le faama'i o le Koviti. O le sauniga foi o le Aso Sa o le Toetu, na ta'ita'ia lava e le Susuga ia Rev Dr Vaitusi Nofoaiga e faaaoga ai le Zoom. Sa tapenaina e le faamuli to'onai mo le Susuga i le Alii Pule ma le Faletua ma le aiga faiaoga ma o latou faletua.

O galuega sa feagai ma le faamuli e aofia ai le faamamaina o le aai atoa i taeao ma afiafi, o le fafagaina o mea tuaolo ma laumei faapea le asia o manu papalagi.

E tele se aoga ma le taua o lenei faamuli i le tapenaina o le Tausaga muamua auā le feagai ai ma le ola aotauina. E faafetaia ai le Susuga i le Alii Pule ma le Faletua, Susuga i Faiaoga ma Faletua, faapea i Faaiuaso ma le Kolisi atoa. E fia faaleo foi le agaga faafetai i aiga, matua, uo ma e masani, ae le gata i lea o Faafeagaiga na tuu mai lo latou tauau, e lagolago ai lenei faamoemoe i soo se ala na ma'ama'u iai.

Faafetai Faafetai Lava



TAUTAI A'E

O le leo ole agaga fiafia ma le fa'agae'etia na faatumulia ai le laumua i Malua ile Aso Faraile, 28 Setema 2022, i se sauniga faapitoa na faia e aloaia ai le Penisione Malolo o nisi o Tamā ma Tinā ole Ekalesia mai le galuega faafafeau. Le galuega sa gapatia ma fitāituga ai mo tausaga e tele, lea ua a'e manuia o latou faiva. E to'afa le aufaigaluega Faifeau, Toeaina ma Faletua na aloaia le Penisione Malolo i lea aso. O toa manumanu ole Talalelei sa faalele e Aiga, Nuu ma Ekalesia auā le Atua ma lona finagalo.

Sa taitai e le Susuga i le Taitaifono o le Fonotele, le Susuga ia Iosefa Uilelea (FT) le sauniga. O i latou na aloaia i lea sauniga e aofia ai; Susuga ile Toeaina ia Siolo Tauati ma le Faletua ia Merita, Susuga Toeaina ia Ioane Viliamu Samoa ma le Faletua ia Vaita'i, Susuga i le Toeaina ia Matapoo Peniamina ma le Faletua ia Penina, ma le Faafeagaiga ia Leauma Faletuese ma le Faletua ia Salamina.

Ua faamalo le toa, ua outou tau le taua lelei, ua iu ia te outou le tausinioga. E faapito augafa se faamatalaga i le Susuga i le Toeaina ia Siolo Tauati (FT), o se sui ole Komiti o Malua, o lē sa galue faatasi ma le Kolisi i ana galuega faatino. Malo le tau, malo le tauatai.

Ua outou togi le seu na lagatila, ua faapulou le tualima, malo fai o le faiva! Lea ua faaeaina outou e le Atua. Mapu ane ia ma le fiafia ma ia manuia tele le feagai ai ma faiga malologa.



Susuga Siolo & Merita
Tauati (FT)

Susuga Ioane Viliamu &
Vaita'i Samoa (FT)




Susuga Leauma & Salamina
Faletuese (FS)

MAFUTAGA A LE KOLISI (cont'd)

FAAMATALAINA FAAMALAMA OLE IUEPeli FOu

O le ata, na te faamatalaina talatu'u ma aganu'u, e atagia ai talitonuga ma mau eseese o taimi ma auga-tupulaga, o suiga ma ona uiga, a'o se lauga fa'amataupu silisili e faaaogaina ai mea faitino, o lanu ma mamanu esese e faamatalaina ai lagona ma talitonuga o le tusi paia ma le tala fa'asolopito o le tala lelei ia Iesu Keriso ma le au kerisiano mai i le amataga.

O mafaufauga ia ma se auivi na lalagaina ai e le tusi ata ni ata o lo'o i le fale Iupeli i Malua nei. E afua i le talitonuga ua aiga tasi le aganuu ma le Talalelei ia Iesu Keriso. Ua o ni mamanu ua tuu faatasi ai mau fa'a-leaganu'u e patino i Malua ma eleele o lo'o iai le Fale Iupeli ma talitonuga faa Kerisiano. E pei ona atagia i le ata lenei, o loo ogatotonu ai le Satauro ae mamanu faatamilo ai pule o le siapo, o le faailoga o le Talalelei ma le aganuu. O launiu i autafa e toe faamanatu le taeao na ifo ai le aso o le Malietaoa ina ua Fatitu ai e lona atali'i o Pouliuligaga le launiu e fili ai o ia e sui ai le tama a le ulugali'i mai Savaii, o loo aumai ai se ata o le alofa tunoa o le Atua ia Samoa. Ao le lupe o loo faapepepepe i luga a'e, o le Agaga Paia o le Atua e tauautoaluaina pea le folauaga a le Ekalesia. O le ata o le saito ma le vine i totonu o le tanoa ava e faamanatu mai ai le faaolataga na faia e le Atua e ala i le tino ma le toto o Iesu Keriso, lea ua avea ma ava mua ao le ava magalo e faamagaloina ai agasala a tagata uma.



O le faa'ofu'ofu o foliga o le ata e pei o se falealuga o se Faleatolau, o loo aumai le ata o le aiga Samoa. O le faleatolau e faatino ai ana lotu asiasi faa lotoifale o le tu ma le aga faaSamoa ao lei taunu mai le Talalelei. Ao le taimi foi e matimati ai le fanau mo so latou lumana manuia. O le Fale Iupeli, o le nofoaga e tapu'e ai le soifua manuia o le Ekalesia EFKS i Samoa nei ma atunu e mamao.

E ui ina tele talitonuga eseese na mapuna a'e i ta'ita'i ma tagata lotu o le Ekalesia i ata o le Fale Iupeli, ona o le mau tauave ma talitonuga e afua mai i le talafa'asolopito ma vaitau o Matini Lutelu i le te'ena ai o ata ma talitonuga faa Katoliko. Peita'i o le poto ma le atamai fa'atusiata na fa'amaite e le EFKS e ala i lana aoga tusiata i Leulumoega fou, na fa'avaeina e le susuga ia Ernesto Coter (Italian Maestro) i Samoa nei ma ona tupulaga, ua afua ai ia fo'i suiga, e pei ona talitonu le tusi ata e le o ata o ni fa'atusa o le lagi, ae ua pei ose potu tusi e teuina ma faa'mauina ai talatu'u ma talitonuga o le Ekalesia mo tupulaga fai mai o le Ekalesia i le lumana'i.



SUI USUFONO A LE KOLISI MO LE FONO TELE 2022

O le Susuga i le Faifeau Fomai Faiaoga ia Samasoni Moleli Alama, o le usufono filifilia lea a le Kolisi mo le Fono Tele i lenei tausaga 2022. Sa folasia foi i luma o le Fono Tele lana pepa ua faaulatalaina ile manatu autu o le Fono Tele 2022

“TUMAU LE ALOFA O LE TASI I LE ISI” (1 Peteru 4:8-10)

MOTU LE PA UA ILOA

AOAO MAI ISI EKALESIA O LE PASEFIKA

O loo faaaauau pea le auai mai o Aoao mai isi Ekalesia o le Pasefika, e aotauina i le Kolisi i Malua nei. I lenei tausaga, ua toe faaaauau le aoga a Susuga i Faifeau e toalua mai le Kiribati Uniting Church, o Beretia Unnang ma Teratabu Takaria. Ua faasolo atu lo la taumafai i le polokalame fou o le Master of Theology (MTh) ina ua mae'a le faailoga o le BD with Honours i le tausaga ua mavae, 2021.

E toatasi le sui mai le Ekalesia Kelisiano Tuvalu, o le Aoao ia Pio Galo ma le Faletua ia Taeamo i le vasega faai'uaso (tausaga 4). E toafa sui mai le Ekalesia Faapotopotoga Kelisiano Tokelau, o le Aoao ia Peoni Lapana (tausaga 3), Elisara Isaako (tausaga 2), Ioane Sosene ma Tui Paulo i le vasega Tausaga Muamua.



VAVAO O LE KOVITI-19 (LOCKDOWN)

E tulaga ese lenei tausaga ona o fesuiaiga i taimi ma polokalame a le Kolisi ona o vavao o le faama'i o le Koviti-19. E le i faatamala le tofā mamao a le Susuga i le Alii Pule ma le aiga faiaoga i le toe faatulagaina o taimi aoga ma malologa faaapea foi i galuega ina ia malu puipuiga i aiga uma o le Kolisi mai lea faamai matautia. Na taofia le Taga (outing) i aso Faraile mo A'oa'o nofotoatasi (single students) a ua faatau uma mai a latou oloa mo le vaiaso e le Kolisi. Mo ulugalii, na o le toatasi sa mafai ona alu i aso Faraile o le Taga e fai le faatau o le vaiaso, ae matuā sa ona ave se tamaititi. E oo mai i le taimi na tapunia atoa ai Samoa i le vavao (Mati 18, 2022), ua masani le Kolisi i taga ma faatinoga i taimi o le vavao. Na o le vaega a le Canteen na faia faatau uma na tausi ai le Kolisi i vaiaso o le vavao.

O vasega uma sa faaaauau pea e ala i le ffaaogaina o fesootaiga i le Internet i auala faatekonolosi pei o le Moodle, Zoom Video Conference, Emails, Facebook voice and video calls, Messenger ma isi; ma sa molimauina pea le lelei o ia faatinoga e ui ina iai faafitauli i nisi taimi i laina o fesootaiga.

E le i mafai ona faatinoina nisi o polokalame masani a le Kolisi pei o ana felaugaiga masani, aemaise foi o le Polokalame Faamasani a le Tausaga 3 ona o vavao o le Koviti.

I taimi o le tuuaga ina ua amata tatala malie vavao o le Koviti, sa tatala pea avanoa i A'oa'o ma Faletua e non- ofo ai i totonu o le aai pe afai e manaomia mo puipuiga lava o le faama'i.

Sa malu puipuiga a alii A'oa'o i le leoina o le aai mo le 24 itula i lea taimi; o se taumafaiga sa taofia ai le oo mai o aiga ma uo e asiiasi mai, a o pisi le faama'i. E le gata i lea, sa mata'itū foi le saogalemu o le aai mai le ono sātia e ni tagata gaoi.

O le tala fiafia, sa manuia puipuiga uma ma malu le Kolisi i ia taimi faigata, auā e ui ina sa aafia nisi, ae ua na o se vaega itiiti e pisia ma vave ona toe manuia. Ia saga viia pea le Atua i lona alofa tausi mai na malutia ai Samoa ma le Kolisi i taimi o puapuaga ma faigata.

MAFUTAGA FAAFOUINA A FAIFEAU



Sa faataunuina le mafutaga Faafouina i lenei tausaga i le aso Gafua 19 Aokuso – i le aso Tofi 1 Setema. Na amata le mafutaga i le aso Gafua i se tapuaiga na taitaia e le Susuga i le Alii Pule o le Kolisi, Rev Dr. Vaitusi Nofoaiga; ma faaiuina i le aso Tofi i se sauniga ma le faamanatuga na taitaia e le taitai o le mafutaga, le Susuga i le Toeaina ia Asotasi Gu Time. O le mafutaga i lenei tausaga, e amata lava i faamalositino i le 5:30 i taeao taitasi, sosoo ai ma le mālu taeao, ona faia lea o le tapuaiga amata ma faagasolo ai folasaga o pepa na saunia e faiaoga o le Kolisi. O afiafi i le 4:30 e faia ai taaloga masani i le malae, sosoo ai ma le taumafataga o le afiafi, ma faaaauau ai isi folasaga o le po, o faafiafiaga a le Acapella a Malua, ma faaiu ai le po i se faigalotu. O lenei foi tausaga sa faatasi mai ai se sui o le Tausi Mavaega, e faia sana tautalaga faapitoa i le mafutaga. E viia ai le alofa o le Atua, ua mafai ona faataunuina i le manuia le mafutaga Faafouina a Faifeau ma Aoao Tausinuu o lenei tausaga.

ATINA'E A LE KOLISI

PAPOVI

Mauluga pea le viiga i le Atua ona o lana tausiga alofa i lo outou soifua ma so matou ola. A o se ripoti lenei mai le vaega a le pa povi.

I le taimi lenei, e 31 manu papalagi o loo tausia e le Kolisi. E 8 pa o loo faaaogaina auā le tausiga o lenei atina'e taua, ma e iai le manatu o se numera talafeagai lenei mo le aofaiga o manu papalagi o loo iai i lenei taimi.

O loo galulue faatasi aoao uma i le faamamāina o nei pa, faatasi ai ma le tausiga o povi. A o tiute faapitoa lava ia a le vaega o le pa povi e aofia ai galuega ina ia malu le pa, o le totōina o vao taumafa a manu, faatasi ai ma le faamamaina o manu mo faamoemoe faapitoa a le Kolisi.

O lenei vaega o loo taitaiina e le susuga i le Faifeau Faiaoga ia Tutoatasi Toalima, ma o loo galulue ai nei aoao e toa sefulu: Russell Ieremia, Paul Mulitalo, Fraser Tauavale, Filipi Ta'a, Isa'ako Tunumoso, Michael Alai, Opetaia Samuelu, Afasene Falanai, Spencer Leuta, ma Sapati Sapati.



O loo faaaauauina pea galuega a lenei vaega e ala i le tosaina o uaea ina ia malu ma saogalemu pea manu i totonu o le pa. E le gata i lea, ua faamautinoaina le ola maloloina o manu papalagi e ala i le faiga paaga ma le vaega o lafu manu a le malō. O loo iai pea le faamoemoe o lenei vaega e faaaauau le totōina o vao ina ia gafatia pea e pa nei e 8 le tausiga o lenei atinae taua.

Ae avea ia lenei avanoa e momoli atu ai le agaga o le faafetai i lau susuga i le alii Pule ma le aiga faiaoga, ona o le lagolagosua i tiute ma faiva a lenei vaega.

Manuia le feagai ai o le Ekalesia ma toe aso o le Fonotele.

Faafetai,
Russell, Paul, Fraser.

MAUMAGA

O le viiga i le Atua Pule Aoao i lona agalelei i le folauga manuia a lana Ekalesia mai ona ao seia paia ona i'u. Ae i le ava ma le migao tele e tatau ai e faamauina ai se ripoti i le tulaga o loo i ai se tasi o atinae a le Kolisi Faafaifeau e ala lea i ana maumaga. O lenei vaega o loo i le taitaiga a susuga i Faifeau Faiaoga ia Olive Samuelu ma Karā Ipiniu.

I le amataga o lenei tausaga sa a'e ai se tofā i le alii Pule ma le aiga faiaoga mo le faia o se asiasiga maumaga a le Kolisi e pei ona masani ai. O lea na aumai ai se fua tapulaa ina ia ausia, e pei o le 500 tiapula ma le 8 pu'e ufi. E asiasi i le faaiuga o le kuata, ma e faia lea faa-Auaiga pei ona vaevaeina ai. Ina ua faia le asiasiga ma matauina ai e lenei vaega, ua ova ma sili mamao atu le numera sa i ai asiasiga mai le aofai sa tuuina atu.



O le taimi nei o loo saogalemu ma ola lauusiusi nei asiasiga ma ua faaaogaina foi le tele o nei maumaga e le Kolisi mo ana taligamalo ma felosipi. O loo tuu avanoa foi i auaiga taitasi i lo latou lava finagalo mo le faaaogaina.

O le gasolo mai i le ogatotonu o le tausaga, sa a'e ai se finagalo o le alii Pule ma le aiga faiaoga, ina ia totoina ma faia se maumaga e fai faatasi e le Kolisi ae tumau pea lona vaevaeina i auaiga. O lea la ua faataunuina lea fuafuaga ma ua mae'a lona faatinoina. O loo faia pea foi galuega masani mo le faamamāina ma le vaaia lelei mo lona saogalemu. E faapena foi le tausiaina o le pa ma isi tulaga uma mo le saogalemu o lenei atinae.

E toafitu le aofai o a'oa'o o loo i lenei vaega; Pio Galu, Limua'a Fu'e, Esera Tufuga, Laupama Lefaoeseu, Aukuso Gasolo, Vagatai Muaau ma Sebastian Tuifao ae o loo i le faamalumaluga a susuga i Faifeau Faiaoga o loo fai ma o matou taitai.

O le ripoti lea ma le agaga e tumu i le faaaloalo tele, faafetai.

Limua'a Fu'e.

PESEPESEGA FAALEAGAGA

FAAMANATUINA 60 TAUSAGA TUTOATASI MALO SAMOA

Sa valaaulia le Kolisi Faafaifeau i Malua mo se sao i pesepesega faaleagaga i le faamanatuina o le 60 tausaga talu ona tutoatasi Samoa. O lenei faamoemoe sa faia i le Aso 4 o Setema i le 6.00 i le afiafi, i le Maota o Tupulaga i Mulinuu. E toalima aufaipese na auai e aofia ai le Aufaipese mai le Kolisi Faafaifeau i Piula, Aufaipese Filifilia mai le Ekalesia O le Au Paia o Aso E Gata Ai, Aufaipese mai le Kolisi Faafaifeau a le Lotu Nasareta, ma le Aufaipese mai le Kolisi Faafaifeau i Moamoa.

Na taualuga e le Kolisi i Malua le po i ana pesepesega sa faaautu “Folau ma le Faatuatua.” O le Susuga i le Alii Pule, Susuga i le Faifeau Faiaoga Fomai, Vaitusi Nofoaiga, o le taitai o le aufaipese a le Kolisi, o ia sa filifilia pese mo le faamoemoe ma lona faataotoga ose lauga:

1. Viiga e 5: e amata lava i le viiga o le Atua, o lē taitai folau
2. Pese faa-Peretania “Search me O God”, o le pese mo le Agaga Paia ina ia fesoasoani mai i le folauga Pese 352 “Le Atua Mamana e,” o le pese e talosia ai le Malo o Samoa
- Pese 224 “Le Masalosalo”, o le faamanatu faalefaatuatua, a oo ina lutia i Puava, e mapu lava i le Atua, o Fagalele
- Pese 48 “Ina tatou faafetai”, o le pese o loo taoto ai le feau o le Tala Lelei (Kerygma), e ala i le soifua o Iesu Keriso na maliu ma toetu mo Samoa.

Na faaiuina pesepesega a le Kolisi i le pese 356 “Lota Nuu” ma talosia ai le Malo o Samoa aemaise le faamanatuina o le 60 Tausaga talu ona tutoatasi.

O le aufaipese a le Kolisi i Malua e aofia ai le Susuga i le Alii Pule ma le Aiga Faiaoga ma o latou Faletua, faapea le mafutaga a A'oa'o ma Faletua. O ta laau, o le Susuga i le Faifeau Faiaoga ia Tutoatasi To'alima, Susuga i le Faaiuaso ia Faafetai Koria ma lona Faletua ia Jeddah Koria. O ē na fuataimi, o le Susuga i le Faaiuaso ia Koria ma le Faletua. O ē na usu toatasi e aofia ai le Faletua ia Valma Tagaloa i le pese “Search me O God” ma le Susuga i le A'oa'o Tausaga Lua o Fred Laban i le pese 356. O ē na lagolagosua i le Susuga ia Laban e aofia ai Susuga i Faaiuaso ia Matthew Tagaloa ma Apelu Isaia, faatasi ma Faletua o Faaiuaso o Faalaniga Tanielu ma Pepe Sasa.

O le aoina o pese sa i lalo o le taitaiga a le Susuga i le Alii Pule ia Nofoaiga, faatasi ai ma le fesoasoani a le Susuga ia Kolia, Susuga ia Toalima, Susuga ia Leuelu Setu ma le Au Asafo.

E avea ai lenei avanoa e momoli atu ai le faafetai tele i le tapuaiga a le Ekalesia Aoao, lau Susuga i le Taitaifono, Susuga i le Toeaina Iosefa Uilelea, Susuga i le Sui Taitaifono, Susuga i le Toeaina Tunumoso Iosia, le Komiti o Tamā o le Ekalesia, le laulau a Fono a le Fono Tele, ma le paia o le Ekalesia i ona tulaga faalupea. Faafetai le tatalo, malo foi i lo outou lagolagosua i le faamoemoe e pei ona alo i ai le Kolisi e fai ma sui o le EFKS i Samoa nei ma atunu i fafo. Sa molimauina lava le fiafia o le Afioga i le Ao Mamalu o le Malo, faapea le Tamaitai Palemia ma sui o le Kapaneta ma le au valaaulia. Ae ui i se taumafaiga a lau Kolisi Faafaifeau, e poto lava le tautai ae sese le atu i ama. O matou lava o ni auauna le aoga. A o le viiga lava e faafoi i le Atua Silisili Ese na mafua ai lenei faamoemoe.

Ia manuia le 60 Tausaga o lou Tutoatasi Samoa!

Ma le faaaloalo tele,
Brian Kolia
(Sui o le Aufaipese)





Komiti o le Maluapapa

Vaitusi Nofoaiga, Visesio Saga, Alesana Palaamo, Fatilua Fatilua, Kara Ipiniu, Clarke Stowers, Leuelu Setu, Esera Esera.
Vaafuti Alauni, Misioka Tanielu, Peresia Muagututia

Malua Theological College
www.malua.edu.ws © 2022